

續
文
獻
通
考

續文獻通考卷之一百六十六

皇明進士雲間王圻纂輯

兵考 軍器

宋

理宗淳祐二年詔淮西制置大使司出十七界楮幣十萬
米二萬斛令安豐軍修武備

遼

聖宗統和三年七月詔諸道繕甲兵以備東征高麗 四
年三月詔林牙勤德守平州以備宋甲鎧缺則取於顯
州之甲坊 四月詔休哥備器甲待秋大舉南征 九
月以大將軍南征詔遣皮室詳穩乞的郎君搜剌先赴

本軍繕甲兵 六年六月詔諸道兵馬備南征攻城器
七年十一月將攻長城口詔諸軍備攻具 二十八
年五月詔諸道繕甲兵以備東征

興宗重熙十二年二月禁關南漢民弓矢

金

太宗天會三年十一月南路軍功司請禁契丹奚漢人挾
兵 海陵正隆四年三月遣使分詣諸道總管府督造
兵器 四月詔諸路舊貯兵器並致于中原時所賦軍
器財用並賦于民箭翎一尺至千錢村落間往往椎牛
以供餉革至于烏鵲狗彘無不被害者

世宗大定八年八月命左衛將軍大殷訪求良弓而磐多

自取出爲隴州防禦使 十五年閏九月定應禁弓箭
鎗刀路分品官家奴客旅許帶弓箭制 時出兵備邊
同州徵箭十萬根以鴈鴈羽爲之其價翔躍不可得觀
察判官張穀曰矢去物也何羽不可節度使曰當須省
報穀曰州距京師二千里如民急何萬一有責下官當
任其咎一日之間價減數倍尚書省竟如所請

章宗明昌六年十二月幸後園閱軍器 承安二年三月
幸西園閱軍器 九月始置軍器監掌治戎器班少府
監下設兵坊利器二署隸焉

宣宗貞祐三年四月制品官納弓箭之令丁憂致仕者免
初納弓箭不分丁憂致仕翰林學士張行簡跪曰弓箭

非通有之物其清貧之家及中下監當丁憂致仕安有
所謂如法軍器今繩以軍期補弊修壞以求應命而已
與倉卒制造何以異哉若干隨州郡及猛安謀克人戶
拘括擇其佳者買之不足則令職輸所買之價庶不擾
而事可辦左丞相僕散端平章政事高琪盡忠右丞賈
益謙皆言丁憂致仕者可免遂得免 興定三年三月
河南路節鎮以上立軍器庫設使副各一員防刺郡設
都監同監各一員

哀宗奔歸德時初患砲少或以泥或以磚爲之議者恐爲
敵所輕不復用父老有言北門之西一菜圃中云有石
砲是唐張巡所置掘之得五千有奇上有刻字或大吉

字甚喜用之 時官奴嘗以火鎗破敵其制以勅黃紙十六重爲筒長二尺諸實以柳灰鉄汁磁末硫黃砒硝之屬以繩繫鎗端軍士各懸小鉄罐藏火臨陣燒之焰出鎗前丈餘藥盡而筒不盡元兵不能支大潰

元

世祖中統二年六月勅諸路造人馬甲及鉄裝具萬二千輪開平 七月命總管王清製神臂弓柱子弓 八月勅燕京順天等路續製人甲五千馬甲及鉄裝具各二千 四年二月詔諸路置局造軍器私造者處死民間所有不輪官者與私造同 至元三年九月命制國用使司造神臂弓千張矢六萬 九年十一月回回亦思

馬因創造巨砲來獻用力省而所擊甚遠命送襄陽軍
前用之 十年正月置軍器永盈二庫分典弓矢甲冑
六月以各路弓矢甲匠並隸軍器監閏月敕諸道造
甲一萬弓五千給淮西行樞密院 十一年八月弛河
南軍器之禁 十六年三月襄加帶括兩淮造回回礮
新附軍匠六百及蒙古回回漢人新附人能造礮者俱
至京師 二十二年五月分漢地及江南所拘弓箭兵
器爲三等下等毀之中等賜近居蒙古人等貯于庫有
行省院行臺者掌之無省院臺者達魯花赤畏兀回回
居職者掌之漢人新附人雖居職無有所預 二十三
年敕路府州縣捕盜者持弓矢各路十副府州七副縣

五副 二十五年七月命六衛造兵器歲以鎧仗上供其精者有西域礮眉牌弩有十五稍九稍七稍五稍三稍砲又有神鳳弩射八百餘步

文宗致和元年造兵器十萬江浙江西湖廣六萬內郡四萬

皇明

國初軍器專設軍器局軍裝設針工局鞍轡設鞍轡局掌管時常整點若有缺少件數隨即行下本局筭計物料委官監督定立工程如法造完差人進赴內府該庫收貯如遇軍職衙門關支仍須計較可否果係應合關人數即便奏聞照依軍法定律支給如係舊管征差軍

士不應關給者行移駁問馬鞍務要查勘本軍先前曾
無關過或轉納何處要見明白纔方放支不許含糊一
槩支給若直隸及各布政司呈稟成造亦須定奪具奏
行下依式造完明白支撥仍拘收原關舊損件數入官
修理若各處有司歲造之數起解到部務要辨驗堪中
行下該庫交收如有不堪者就將原經手人員取問其
軍裝衣鞋別無定例若有奉 旨給賞臨期下庫支給
軍法定律一百戶

銃手一十名 刀牌手二十名 弓箭手三十名
鎗手四十名

軍器局造

二意角弓

交趾弓

黑漆鉞子箭

有蠟弓弦

無蠟弓弦

魚肚鎗頭

蘆葉鎗頭

馬軍鴈翎刀

步軍腰刀

將軍刀

馬軍叉

紅油團牌

水磨鐵帽

水磨頭盔

水磨鎖子護頂頭盔

紅漆齊腰甲

水磨齊腰鋼甲

水磨柳葉鋼刀

水銀摩挲長身甲

併鎗馬赤甲

針工局造

長胖襖

袒裋袴

鞍轡局造

鞍

轡

韉

凡青布鐵甲每副用鐵四十斤八兩造甲每副重二十

四斤至二十五斤 銅手銃重五六斤至十斤

軍器鞍轡二局成造

鐵盔三千六百頂 甲三千六百副

腰刀三千六百把 長鎗一千八百條

鐵牌盔二百四十頂 團牌二百四十面

撒袋一千八百副 腰刀韉帶三千六百條

造一

碗口銅銃三千箇 手把銅銃三千把

銃箭頭九萬箇 信砲三千箇

檟木馬子三萬箇 檀木槌子三千把

檀木送子三千根 檀木馬子九萬箇

以上三年一造

南京兵仗局前廠季造數

硃紅油貼金勇字鐵盔一百五十頂 硃紅漆貼金勇
字皮盔二百頂 硃紅油貼金勇字牌手鐵盔五十頂
併鎗馬赤甲四百副 黑漆二意角弓二百四十張
弓弦六百八十條 明素油撒袋三百四十副 黑漆
鞘靶腰刀三百四十副 黑漆透甲鐵箭射馬鐵箭共
一萬七千五十枝 硃紅布漆攢竹桿馬鎗一百條
硃紅布漆攢竹桿旗鎗一十條 硃紅布漆鍍水銀獅
子頭圍牌五十面 斬馬刀五十把

太祖洪武四年以脚踏弩給各邊將士仍令天下軍衛如
式製造 七年令線穿甲悉易以皮 十一年定天下

歲造軍器數盈甲等項一萬三千四百六十五件馬步
軍刀二萬把 十六年令造甲每副領葉三十片身葉
三百九分心葉十七肢窩葉二十俱用石灰淹裹軟熟
皮穿浙江沿海并廣東衛所用黑漆鐵葉綿索穿成其
餘俱造明甲 二十年令天下都司衛所各置局軍士
不堪征差者習弓箭穿甲等匠免致勞民 二十三年
以天下歲造弓箭擾人令工匠輪班赴京成造 二十
五年令官軍開領軍器將姓名數目造冊收貯仍於各
器上記官軍姓名損失卽令償官 二十六年造柳葉
甲鎖子頭盔六千副給 皇城守衛軍士
成祖永樂元年奏准造弓式面闊三指其力自七十斤分

爲四等箭造尖銳錐箭造腰刀靶通用斜皮鉉砲或專用熟銅或生熟銅相兼鑄造 二年奏准各處成造軍器合用顏料係軍衛者軍衛自辦係有司者有司支撥不許將不係土產硃漆等項高貴之物一槩科擾

英宗正統四年令造軍器於兵仗局各取一件爲式每三月差給事中御史試驗 又令天下各衛所所造軍器每月具報惟湖廣銅鼓等衛路遠者歲終一報

景皇帝景泰二年奏准通行天下衛所每衛一季成造盔甲鎗刀弓各四十件圓牌二十面弦八十條箭一千二百枝撒袋四十副銳箭四百枝每千戶所一季成造盔甲鎗刀弓各十件圓牌五面弦二十條箭三百枝撒袋

十副銃箭一百枝永爲定例仍令巡按御史同按察司
官五年一次吊卷查盤如有成造不如法及侵欺等項
情弊就便追問 五年令各處守備官採取雜木製銃
箭火藥操演務要密切關防不許漏泄式樣違者重罪
英宗天順八年造戰車製如民間小車但前增三面木板
潤二丈二尺高六尺彩畫飛虎獸面上開小窓下三面
各留銃眼

憲宗成化二年令每步隊造小車六輛輛載九人軍裝二
人推挽放銃七人行則爲陣止則爲營空處張掛布圍
畫作獅頭牌面又於營外每車添設木椿二根絆馬索
一條每車用布幕二扇俱用旗鎗張掛小紅纓頭並生

鐵鈴鐺 又奏准天下衛所照依原定則例督匠按季
成造軍器完日會同原辦物料有司掌印官員查點見
數如法試驗堪中仍用油漆調硃於點過軍器背面書
寫某衛某所某年某季成造字樣候至五年本部通行
各該巡按御史查盤若各該衛所官旗軍人等仍前侵
欺物料以致缺料成造及不如法者將指揮千百戶各
降一等叙用不許管事旗軍人等各發極邊衛分充軍
十六年以在庫弓箭弦足用折徵價銀三年每弓一
張銀六錢二分箭一枝三分弦一條五分其餘年分仍
解本色

孝宗弘治十一年奏准成造令旗令牌三百面副每旗定

用闊綯一幅長四尺闊一尺九寸每錠連桿長六尺五寸圍圓二寸三分每牌連臥虎蓋長八寸厚七分俱編令字一號起至令字三百號止用火烙印記仍置印信文簿一扇開立前件遇有征進并內外鎮巡等項官員領去各邊應用隨將原領旗牌逐一附寫字號若有事故等項繳回奏換就於前件項下明白註銷如有損壞或比對原號不同者聽從本部叅提究問 又奏准於河南鈞磁二州各委官燒磁砲五千箇完日送巡撫官處驗中運送來京轉發該局收貯備用 十三年奏准成造斬馬大刀完日差人解部山東二千五百把河南二千把浙江四千把福建二千把江西一千五百把南

直隸二千五百把 又奏准成造拒馬木二千架竹牌
二千面滾刀五千把 又奏准今後各處解到軍器本
部收候類送該庫交收敢有生事刁難需索財物者重
罪不饒 又奏准各處軍器局造作長鎗斬馬刀牌甲
弓箭不如法者都布按三司堂上委官各府衛掌印官
并管局委官叅問降級 各處巡按御史都布按三司
分巡分守官查盤軍器若衛所官旗軍人等侵欺物料
那前補後虛數開報及三年不行造冊奏繳者官降一
級帶俸差操旗軍人等發邊衛充軍其各該都司并分
巡分守官怠慢誤事者叅究治罪

世宗嘉靖元年奏准浙江江西福建湖廣布政司并南直

隸蘇州等府歲額民弓箭弦徵價解部於軍器局催匠
團造 四年奏准仍解本色 二十二年令盔甲廠改
鹿皮鞋帶爲透甲牛脂皮鞋帶改直領對襟擺錫丁甲
爲圓領大襟 二十九年題准各處歲解斬馬刀折造
盔甲 三十年奏准南方民弓箭弦通行折價解京分
發附近各省府山東山西河南三布政司各五千副真
定等七府各一千副委官如式成造其有不堪追賠究
治 二十一年題准行兩廣選取強弩藥箭巧匠令軍
器局督造發邊後令該省成造弩弓一千張并藥箭解
部仍每年造毒藥三十斤限六月以裏解到等議停止
二十七年題造硬弩二一并發二矢一并發三矢比

神臂爲遠定名克敵弩令寶源局造送各邊應用每邊
一千張 四十三年題准行各衛所將六辦明盔盡改
造八辦帽兒盔其大甲一半改紫花布長身大甲新式
一半照舊式惟有身加長二寸共修造甲一萬一千三
百一十二副卽是二十九年以後停造長牌圓牌工料
補添免行加派所造盔甲每年限七月以裏解部
穆宗隆慶元年頒京廠清油大弓及小鐵頭紅箭線弦式
樣令各省有司每歲如式造解 三年題准各處弓箭
弦條俱徵解物料

今上萬曆十年令在京兩廠造明盔甲五千副給京營軍
士以五年爲期每年千副

凡試驗軍器 嘉靖二十八年題 近 西安門建造
試驗官廳一所遇有各處解到軍器弓箭弦等項工部
劄行司官及容兵部委司官會同試驗精美合式給與
進狀呈部劄委戊字庫官吏請科道官復行查驗照數
收庫查驗不堪本部駁回部補造解 隆慶五年題准
軍器局年例造完開數送部委官查驗如式貯庫仍造
冊奉報

凡查盤軍器 嘉靖八年奏准盛甲廠貯庫物料差科
道官會同工部委官并管廠內外官員盤驗過給造軍
器 十一年今盛甲廠成造軍器於累年允下軍器內
查驗應該修理若干破壞可作廢鐵若干該扣允物料

若干開報本部施行

凡折徵軍器 嘉靖二十年題准每弓一張銀四錢一分箭一枝銀一分九厘五毫弦一條銀二分九厘八毫此外不許濫徵工匠銼磨及解扛腳價 萬曆五年題准福建兩廣南京一字庫胖襖自本年始改徵折銀徑解工部

凡兵器無益於實用者其故起於侵漁也當未製器之前營求領造一費也委官常例二費也吏書庫子侵剋三費也匠作冒破四費也以故造作不堪用深可痛恨至如鳥銃不惟無用且悞事匪輕今而後制器須知兵主將廉且明者自爲料理無徒付之委官製完送軍門

逐一親驗一件不良一兵性命所係其身且不能護况
克敵乎故須軍門件件經心件件過目必得實用方可
若查驗出仍前作弊重究贓罪責賠無貸

凡關領軍器除三年一次六年一次十二年一次不時
關領 京營春秋操演官軍每員名各盔甲一副鎗刀
銃砲等件俱軍器局開操關領歇操交還 京營及巡
捕官軍防春防秋各兵火器械遇警於內庫關領事畢
交還 出征官軍所部叅隨頭目人等各一蓮明鐵盔
青紵絲齊腰甲青綿布吊線甲倭腰刀黑漆弓真皮撒
袋矛鎗行兵仗局關領兵部應付裝載前去事寧交還
聖駕親郊圍壇九門及各路擺隊軍約用盔甲九萬

餘副行庫放給畢日交收 親祀山陵扈從官軍盔甲
刀鎗毛馬響鈴頓項臂手等件行兵仗局關領畢日交
收 公侯伯及錦衣衛指揮等官遇待衛供事奏討
御用監盔甲腰刀奉有 特旨方准關給

凡九門軍器 嘉靖二十一年題准行戊字庫放弓箭
撒袋腰刀一萬六百四十一副給巡捕九門官軍免其
交還 三十年議准將戊字庫節年收貯長圓挨牌共
一十六萬有餘運送九門城樓堆放 四十一年題准
將各門堆放軍火器械逐一查明分別應存應發并損
壞短少数目造冊呈報除該存留外發兵仗軍器等局
交收 隆慶元年議准各門存留器械清查修換仍貯

各門指揮等官看守置立循環簿每年五月內兵工二部委官會同照冊查盤不許損失 又以朝陽東直安定德勝四方通行要路廣渠東便二門切近運河各門除原用連珠砲快鎗夾靶鎗外添給中樣鐵佛郎機二十架一窩蜂砲六位快鎗四十桿

凡戰車 洪武四年令山西北平河南山東各造獨轆車一千八百輛以備征進之用 景泰三年正月令廷臣共議備邊長策李賢上言虜所以敢輕中國者恃其弓馬之強而已臣觀今日之拒馬木止能拒馬不能避箭挨牌止能避箭不能拒馬今中國長策惟有所謂戰車若衛青之武剛車可以禦之又有取勝之道則火鎗

是也國之長技無出於此若用得其法虜弗能當也臣
觀車制四圍箱板內藏其人下留銃眼上開小窓長一
丈五尺高六尺五寸前後左右橫排銃頭每車前後占
地五步若用車千輛一面二百五十輛約長四里欲行
則行欲止則止謂之有腳之城內藏軍馬糧草輜重以
此禦敵使馬不得衝陣箭不得傷人彼若近前火砲齊
發奇兵繼出彼若遠遁我勢益張我威益振備邊長策
莫善於此 天順八年令造戰車制如民間小車但前
增三面木板闊二丈二尺高六尺彩畫飛虎獸面上開
小牕下三面各留銃眼 嘉靖十二年議准團營收貯
先年戰車改造載銃手車七百輛 二十九年奏准造

戰車九百輛鹿角架五十副 三十年題准造單輪車
一千輛雙輪車四百輛單輪弩車四十輛 四十三年
題准京營該用兵車每營四百輛共四千輛每輛前帶
鹿角木上安拒馬鎗迎風牌一面兩傍偏廂牌二面上
下裹鐵葉二寸前後車板二副竹桿鎗一根約一丈五
尺鐵鍋一口鐵索一條約一丈二尺每輛可容步卒五
人給神鎗夾靶鎗各二發營教演 隆慶三年八月遼
東撫臣魏學曾請於廣寧設戰車營以原任遊擊將軍
馬文龍統之報可車倣偏廂之制每二輪中設拒馬鎗
一架塞其隙車駕上下用綿絮布裱障之以避矢石每
車上載佛郎機二杆下置雷飛炮快鎗各六桿每拒馬

鎗架上樹長鎗十二桿下置雷飛砲快鎗各六桿每車
用卒二十五人共車一百二十輛步卒三千人 萬曆
三年奏准造車一千二百輛每輛用二號佛郎機三架
鳥銃二架地連珠二架湧珠砲二位快鎗一桿大旗二
面小旗一面木盾二面虎叉二枝長鎗二柄大砍刀二
柄布裙一條

凡旗牌 正統元年奏准令旗令牌在外不許輕造閒
常不許擅用班師之後照驗還官 嘉靖十二年料造
一百面副 二十四年料造三百面副 二十九年料
造三百面副 隆慶二年料造三百面副今字號數接
編如前今至一千七百號止俱題行軍器局造造完收

庫備領 近例關領旗牌凡總督京營十一面副協理
京營并各邊總督及掛印總兵各十面副提督八面副
贊理軍務六面副總兵各五面副參將遊擊各
三面副

凡火器係 內府兵仗局掌管在外不許成造其銅鐵
手把銃碗口銃邊關奏討及添造必須鎮守巡撫等官
公同會議該用數目明白奏准鑄造給用

火車

火傘

大將軍

二將軍

三將軍

奪門將軍

神鎗

神銃

斬馬銃

手把銅銃

手把鐵銃

碗口銃

一窩蜂

神機箭

銃箭

襄陽砲

信砲

蓋口砲

神砲

大樣神機砲

小樣神機砲

碗口砲

銅砲

大砲

小砲

旋風銅砲

砲裏砲

鉛彈

嘉靖四十三年令京營演放火器改用鉛彈

泥彈

隆慶二年改鑄鐵彈五年後改鉛彈日記損失止

操奏補

凡各邊奏討火器

嘉靖四十三年薊鎮奏討火器該

局缺少令以便利火器抵給

隆慶五年題准宣大每

五年例領神箭一萬枝每枝改折鉛彈四箇每箇重六

錢以後年分給荒鉛一千五百斤送鎮造用

令例薊

鎮三年關領火器一次宣府五年一次遼東延綏三年

關領硫黃燄硝一次

遼東黃二千斤硝三萬斤延綏黃三千五百斤

宣府寧夏

甘肅俱五年一次

宣府黃一萬斤硝五萬斤寧夏甘肅黃三千斤

凡關領火器舊例征進每隊給神鎗八神銃二哈喇蠟

袋火藥全

丘文莊公曰自古中國所謂礮者機石也用機運石而飛之致遠爾近世以火藥實銅鐵器中亦謂之礮又謂之銃銃字韻書無之蓋俗字也其紙爲之者俗謂之爆爆者如以火燒竹而有聲如竹爆然也今礮之制用銅或鉄爲具如箭筒狀中實以藥而以石子塞其口通一線用藥發之其石子之所及者無問人物皆糜爛然惟川之攻與守也戰則資其聲以爲號令焉近有神機火

鎗者用鐵爲矢鏃以火發之可至百步之外捷妙如神
聲聞而火卽至以永樂中平南交人所制者尤巧
命內官如其法監造在內 命大將總神機營在邊
命內臣監神機鎗蓋慎之也天助 國家錫以自古所
無之兵器五兵而加以一五行而用其三可以代矢石
之施可以作鼓角之號可以通斥堠之信一物而三用
具焉嗚呼神矣哉自有此器以來中國所以得志于四
夷者徃徃藉此然用久而人玩敵人習知其故或出其
巧智以爲之避就者亦不能無也何也蓋士卒執此鎗
而用之也人持一具臨時自實以藥一發之後倉卒無
以繼之敵知其然凡臨戰陣必伏其身俟我火發聲聞

之後卽衝突而來請自今以後凡火鎗手必五人爲伍就其中擇一人或二人心定而手健目疾者專司持放其三四人互爲實藥番遞以進專俾一人司放或高或下或左或右應機遷就則發無不中者矣其視一發卽退心志不定而高下無準者有間矣又宜用紙爲爆其聲與火鎗等者每發一鎗必連放三五紙爆或前或後以混亂之使敵不知所避如此則其用不測而無敵于天下矣又謂自昔談兵者皆以弩爲中國之長技今世則惟用弓矢而所謂弩者隊伍之間不復用矣意者有神機火鎗之用以代之故不復置歟虜惟用弓矢一事今我旣用弓矢又用火鎗而又復用古人之弩則是虜

之長兵一而我之長兵三以一制三虜騎欲來衝突不待短兵接而我之三技已斃之于百步外矣 嘉靖中兵部郎中唐順之上疏云虜所最畏于中國者火器也國初止有神機火鎗一種天助 聖明除克滅虜而佛郎機子母砲快鎗鳥嘴銃皆後出鳥嘴銃最猛利以銅鐵爲管木橐承之中貯鉛彈所繫人馬洞穿其點放之法一如弩牙發機兩手握管手不動而藥線燃其管背施雌雄二杓以口封杓以杓對所欲擊之人三相直而後發擬人眉鼻無不着者捷于神鎗而準于快鎗火技至此而極是倭夷用以肆機巧於中國而中國習之者也往年京師亦嘗造數百管其煉鑄既苦惡而又無

所用之是以遂爲虛器請令東南軍門取其精者數十
管而與善點放者數人至京師 陛下令大臣閱試之
使知有此器而不用以保全虜人之腰領其亦可惜也
二十三年北虜密令叛人潛入 京師習佛郎機大
礮事覺擒獲誅之 隆慶二年六月 詔給薊鎮製造
戰車火器銀四萬六千五百兩有奇 七月給大同鎮
軍盜甲一千副火器銀一千七百兩從總督趙畚請也
萬曆二十五年二月原任薊鎮練兵把總蕭正東奏
征勦倭奴火攻盡圖進覽奉 旨這所奏火器就著他
去防倭試用 二十六年三月天津撫臣萬世德奏軍
火重務私販橫行速爲議禁以足國用合行各省直產

硝地方設法稽查立廠官賣但有私煎私販一體究罪
仍嚴稽查商引凡省直置造火器召商販者必給有撫
院各兵道印信公文明開合用硝黃數目方准納稅收
買其餘別衙門文引俱不准行又必申嚴海禁凡閩廣
浙直出海商船但盤有硝黃不拘多少卽照例殲遣無
赦務使通番之販不得行其奸對敵之夷無由操其技
從之 五月文華殿中書趙士禎貢進制勝利器以振
國威以彰 天討得魯密番銃手錦永衛指揮朶思
麻帶來神器原式成造恭進 計開 神器譜圖說冊
籍一本西域魯密番鳥銃一門藥罐二箇發藥罐二箇
水西洋番鳥銃二門藥罐二箇發藥罐二箇銃把手二

把製雷銃二門子銃十門銃袋二箇描金朱紅櫃一座
迅雷銃一座藥罐一箇藤牌一面架銃斧一把朱紅架
一座

初太祖以神武定天下盡古今火攻之具靡所不有
藏之武庫每歲神機營軍演習奇名異狀人多不識其
用不啻數百種而已也今人胥言佛郎機烏嘴銃傳自
番舶魯開之叅將戚繼光云昔署衛印時嘗發山東地
窖佛郎機乃成祖所蓄年月鑄文可稽又於衛庫中
見烏嘴銃皆倭變未作中國所故有者又聞胡序班云
渠諳火攻法二三十種偶從南都神機營銃手竊而行
之所未得者尚以三百餘計也又聞正統己巳虜騎

薄都門京軍隨 駕出者過半司馬于謙以軍器局神
鎗試之火石所及人輒成粉一砲而虜死數萬血湧如
川遂解圍去可見兵器莫備於我 朝私習之禁莫嚴
於我 朝承平久而民不習兵亦莫如我 朝也如愚
見治世右文亂世右武邇來歲受兵患詎可以平世例
論哉凡識火攻者軍門有私習之罪募而用之仍嚴炤
硝下海之禁區區海寇觸吾者碎犯吾者焦有不談笑
而蕩滅也哉善戰者形人而我無形明乎此則兵不血
刃而億萬人悉爲吾所降服不明乎此則荷戈執戟之
士棄仗而走反資敵矣是故兵器也者謂其爲戰具則
可恃之以勝敵則不可

鄭元韶防春條議云禦寇莫先於軍火器械今查戰兵
凡鎗刀狼筈竿子弓箭牌鏢等項人亦習知其法但弓
手止知射長箭而不知射邊箭弩手則全無一人不知
長箭去遲而敵人易見故彼得以閃避且能拾取還射
其利在彼邊箭去疾而敵人難窺非惟彼不能避抑且
不能回射况邊箭所到倍於長箭百倍其利在我宜令
弓手各習長邊二箭倘賊去我尚遠則射邊箭如賊已
近則射長箭斯兩盡矣若弩則箭既可及遠而封藥於
末又可立刻殺人須力重而機巧者習之其矢之長短
輕重大小要與弩弦相比乃能命中而及遠也又查得
各戰船原領發項等項皆生鐵所鑄遇放每致崩裂不

惟不能擊賊而且悞中船兵佛朗機皆鏽損不堪厚薄不一袖銃則又短小及無龍頭打放如以各項漸次改造飛礮銃鳥銃給發各船庶得實用

火器論

兵家器械甚多有宜於山戰者有宜於陸戰者有宜於水戰者如武經總要所載是也要之利於今日海戰者無踰於火器其名雖有二三百種而海船得用亦惟噴筒火藥桶二者蓋噴筒所及有一百五十步之遠橫占丈餘火藥桶拋入賊舟賊一時不知取而視之內火發矣未發之先水不及沃臨發之際人不能救觸之者碎犯之者死故敵舟離遠則用噴筒敵舟相逼則用火藥

桶此二者皆海船利器今日禦寇之切要也

海中戰法攻船爲上若以我大船擊敵小船觸之無不壞者其次則恃火器火器之中亦惟火毬火藥桶投入賊舟卽時焚燬信至妙也或問我以火攻敵使敵亦以火攻我如之何曰以火攻敵全靠舵工得人持舵得法我常奪據上風則敵之火攻將爲風所驅而反攻之矣大抵火攻之法須先自爲水備假如一舟五十人但用十人持火器其四十人俱執水斗水桶遇敵火攻羣手傾水滅之烏能焚我耶或又曰設使我用火攻而敵知水備如之何曰敵若知備則雖不能焚敵敵亦必救火而亂矣我乘其亂而擊之豈不勝也哉

短兵相接乃倭奴所長非中國之民所易敵也其所歎者火器耳今鳥嘴銃反爲彼之長技而我兵鳥銃手雖多不能取勝何耶倭人忘命我兵望之輒懼而走或鉛子墮地或藥線無法手掉目眩仰天空響議者謂宜禁通番接濟火藥之人甚善愚謂硫黃出產在彼何禁之有所當禁者焰硝耳此吾中國之物若官司設法不容入番則倭奴之火器爲無用而我以火器攻之彼之短兵烏能加于我耶

按接濟焰硝沿海通弊所謂籍寇以兵兵家大蠹彼硝戶旣嗜奸民之厚直而奸民又餌外夷之重利則硝出之民法將焉禁必欲設法其禁私煎乎蓋硝與塩同功

異用硝之在軍需者爲多民間所用幾何若通行天下收煎戶籍之於官開煎局委以良吏民間所需不過斤以上耳價納官賣積爲軍儲則民無私煎典有明禁不尤補於軍政之實用乎

火毬一法舊制紙糊圓砲不過震响一聲而已何益於事合於糊成紙殼之時中含小鐵刺菱二三十枚地火鼠一二十枚然後入藥於內繫糊其口每砲一枚竅眼四處各穿藥線使丟落城下不致滅火賊近城或臨敵燃砲而發砲聲一响則其中所藏刺菱自然布散火鼠飛燒賊身必將奔走而刺菱又傷其足我兵乘而擊之是亦一助也

總論軍器

國朝偃武已久民不知兵修遇醜夷遂若強敵不知中國武藝不可勝紀古始以來各有專門秘法散之四方若召募得人以一教十以十教百卽刀法一藝且不足以當我况其他乎試舉其畧言之如使鎗之家十七曰楊家三十六路花鎗其分者曰六門干日小門干日推紅六合日埋伏六合日邊日馬家鎗上十八盤中十八盤下十八盤日金家鎗日張飛神鎗日五顯神鎗花鎗七日拐突鎗日拐刃鎗日錐鎗日梭鎗日槌鎗日大寧筆鎗日拒馬鎗日搗馬突鎗日栽崙鎗日沙家十八下倒手干子曰紫金鏢日地舌鎗使刀之家十五曰偃月刀三十六日刀法

雙刀曰鈞刀

陰手陽手

曰手刀曰鐮刀曰掉刀曰太平刀曰

定戎刀曰朝天刀曰開天刀曰開陣刀曰割陣刀曰偏

刀曰車刀曰七首使劍之家六曰馬明王曰先主曰下

莊曰王聚曰馬超曰邊掣厚脊短身使弓弩之家十四

曰邊箭曰兩廣藥箭曰火箭曰神機箭曰楊家箭

上搭中搭

搭曰馬家箭

分中磨旗穿心推紅又有馬上未秋

曰神箭袖彈曰手弩曰

諸葛弩

我動而弦自張一發四矢

曰連環弩曰雙弓床弩曰三弓床

弩曰打柱弩使棍之家三十有一曰左少林曰右少林

曰大巡海夜叉曰小巡海夜叉

少林夜叉有前中後三堂之殊單手夜叉也中

堂陰手夜叉也類刀法後堂夾第帶棒

曰大火林曰小火林曰黑虎孫張

家棍曰觀音大鬧南海神棍曰稍子棍曰連環棍曰雙

頭曰陰手短棍

計十二路

曰雪捧搜山棍曰大八棒風磨曰

小八棒風磨曰二郎棒曰五郎棒曰十八下狼牙棒曰

趙太祖騰蛇棒曰安猴孫家棒曰大六棒繫纏身曰十

八面埋伏紫薇山條子曰左手條子曰右手條子曰邊

欄條子曰雪搽柳條子曰跨虎條子曰滾手條子曰賀

屠鈎杆曰西山等家硬單頭使雜器之家十曰鐵鞭曰

夾棒曰單手爆鐵鏈子曰漢藜算頭曰金剛圈曰鍔掌

鐵尺曰呂公拐子曰剛叉曰狼筈曰鑊使鈇之家五曰

雄牛出陣鈇曰山門七埋伏鈇曰番王倒角鈇曰直行

虎鈇曰稍欄跟進鈇使馬上器械之家十六曰鞭曰鍊

曰鑊曰槌曰流星曰鎖虎口曰馬叉上帶使流星鞭曰

雙舞劍曰雙刀曰馬叉曰天平鏟曰天方基曰鎗曰關
刀曰斬馬刀曰月鎗使拳格兵器之家十一曰趙家拳
趙太祖神拳三十六勢燕湖下西州曰南拳似風似燕
二十四勢抹陵開打韓童掌拳六路曰溫家鈞掛拳似退似退
凡四曰北拳凡四路曰西家拳六路曰溫家鈞掛拳十二路
曰孫家披掛拳四路曰張飛神拳四路曰霸王拳七路曰猴拳
三十路曰童子拜觀音神拳五十路曰九滾十八跌打搥拿
又有眠張短打破法九內紅八下等破法三十六拿法
三十六解法七十二跌法七十二解法一百三十教師
相傳各臻妙際為將者擇兵士資之所近心之所好而
教之或專習一藝或兼習群藝藝超於百人者推為百
人之師超千人者推為千人之師超萬人者推為萬人

之師有不戰戰必勝矣

續文獻通考卷之一百六十六終

續文獻通考卷之一百六十七

皇明進士雲間王圻纂輯

刑考 刑制上

宋寧宗嘉定六年起居舍人真德秀奏釋楮幣苛禁其累
曰頃者朝廷以楮幣日輕行新令慮士大夫奉行不恪
於是威之以奪竄斥之刑慮民之虧減牟利於是儆
之以沒入家貲之罰中外有司苟能體朝廷之意擇其
甚者而加懲則人孰不畏迺有未嘗玩今而以玩今言
未嘗誤國而以誤國劾或因寮屬之讒而不究其實或
因豪強之謗而輒徇其私是豈朝廷立法之本意耶至
若籍沒之刑尤多濫及蓋有胥吏利其多貲而因以傾

奪者矣有間巷平時睚眦而因以中傷者矣夫估籍之禍甚于刑誅刑誅雖酷痛止其身貲財一空盡室溝壑今乃不量其輕重而驟施之亦豈朝廷立法之本意耶伏望深詔輔臣稽叅衆論凡州縣官有因奉行新奏爲監司守臣按劾追削居住其倚法漁利重爲公私之蠹者自無足議其間咎犯稍輕及止緣才術短拙情在可矜者當此郊需之餘量行牽復許之自便至于估籍一節雖令申審然展轉經營縱幸獲免已亡其半謂宜明勅監司守令自今民間有違犯約束諭告勿悛者止當嚴實典憲不許更籍其家亦足以廣聖朝維新之澤太學博士許應龍奏請刪定近制其畧曰臣聞有法之

弊有例之弊法之弊易見例之弊難革法而用例此今日之大患也夫著而爲律疏而爲令編次成書各有條目蓋截然而不可易也是雖有旁照有通用舞文弄法者固未免輕重出入於其間然使有司精明詳考而熟究之其奸莫能逃也豈不曰法之弊易見乎乃若例者或出於一時之特恩或出於一時之權宜有徇親故而開是例者有迫於勢要而創是例者揆之于法大相牴牾而後來者拔援不已案牘在胥吏之手有司不可得而知也求者執已行之比有司不得而拒也豈不曰例之弊難革乎今百司庶府循積習之弊舍法而用例焉非不知三尺之皆適也執而不行恐至於拂人情甚至

召衆怨遂使胥吏得以執其柄而容其私厚賂以賈之
則以爲有例之可行請求之未至則匿其例而不用長
吏知之而不能禁天下交病之而不敢言昔韓琦目擊
其弊取其可用者而刪其冗繆是以吏無所容其奸今
莫若明詔有司搜求前後已用之例公共參酌可行者
留之不可行者去之使輕重得宜於法意不相違戾編
爲成書藏之有司凡有陳乞擬此施行若是書所不載
者皆抑而不予庶幾權不在吏而奔競妄求者無所容
其巧矣

十六年二月臣寮奏檢驗不同要害致命之因法至嚴
矣而檢驗失實則爲覺舉遂以苟免欲望睿旨下刑部

看詳頒示遵用刑寺長貳詳議檢驗不實當覺舉自有見行條法今檢驗不實乃爲覺舉遂以苟免今看詳命官檢驗不實或失當不許用覺舉原免餘並依舊法施行從之

理宗寶慶二年二月詔諸道提點刑獄以五月按部理囚徒三月決大理三衙臨安府兩浙州縣繫囚紹定二年正月大理寺直張玠進對論州縣檢驗鞠獄四事上曰刑獄人命所係豈容不謹端平元年十一月詔諸道申奏獄案未斷已斷未下者於都司刑部大理寺各委官立限催督稽攷其經由去處嚴立程限月申御史臺其申憲司詳覆而別無疑慮者不詳規避嘉熙

四年九月詔川廣監司以十一月按部理囚徒 淳祐
七年八月詔石鈞陳大任王方烈各降一秩懲其誣平
民爲重辟謝思義張懋各進一秩旌其平反之功 三
年七月臣寮奏乞今後疎決先期降旨下臨安府三衙
應犯罪在指揮前許引用恩赦如指揮後有犯雖已停
決不在原減之數其各引赦人不許於停決前輕行斷
遣如或違戾並從故出入人罪條制施行令刑部詳度
上于尚書省 是年五月詔諸路監司郡守毋得藉沒
民家

丘氏濬曰按宋史刑法志理宗朝天下之獄不勝其酷
每歲冬夏詔提刑行郡決囚提刑憚行悉委倖貳倖貳

不行復委幕屬所委之人肆行威福以要餽遺監司郡
守擅作威福意所欲黥則入其當黥之由意所欲殺則
證其當死之罪呼喝吏卒嚴限日時監勒招承催促結
款而又擅制獄具非法殘民有夾幫腦箍超棍等名富
實之家稍有胥隸動籍其貲不問輕重並從科罰州縣
往往專殺拘鎖淹滯囚繫死而後已又以已私摧折手
足受豪強賂羅織平民囚殺之至度宗時雖累詔切責
而禁止之終莫能勝而國亡矣說者謂宋以仁厚立國
今觀刑法志所云則其一時司刑之吏刑人之具殆與
漢武帝唐武后時無以異也卒至垂天地之和促國家
之脉而召裔夷之禍嗚呼豈無自而然哉

六年五月右正言何琮奏自今官吏贓狀敗露經臺諫
監司奏劾分明者即下所屬州郡拘贓聽朝廷議罰或
移爲他用併籍其家從之 淳祐八年二月陳垓言檢
覆決獄踈決推勘拘鎖刺環奏裁詳覆重勘追證十弊
從之 十年七月上諭輔臣曰在法詞訴須經次第官
司其臺部受詞所當參酌兩造豈宜據憑單詞剖決致
使所屬觀望曲直倒置可令御史臺及刑部遵守 十
一年十月詔戒兩淮都統司主兵官今後刑罰不許輕
用脊棍以傷人命 十二年四月詔鄭清之等上勅令
所著淳祐條法事類四百三十卷 景定四年十二月
詔刑部下諸路憲司所部州縣不許慘酷箠楚及毀除

非法獄具違者重寘于罰

遼初阻午可汗知宗室雅里之賢命爲夷離謹以掌刑辟其制刑凡有四曰死曰流曰徒曰杖死刑有絞斬凌遲之屬流刑量地遠近徙刑量年淺深加以黥刺杖刑自五十至二百凡杖五十以上者以沙袋決之沙袋者穆宗時制用熟皮合縫之長六十寸廣二寸柄二寸許又有木劍大棒鈇骨朵之法木劍大棒者太宗時製面平背隆大臣犯重罪欲寬宥則擊之棒之數三自十五至三十鈇骨朵之數或五或七有重罪者將決先以沙袋于脰骨之上及四周擊之拷訊之具有粗細杖及鞭烙法

粗杖之數二十細杖之數三自三十至于六十鞭烙之數九烙三十者鞭三百烙五十者鞭五百被告諸事應杖而不服者以此訊之外此有贖罪之法有八議八縱之法其餘非常用而無定式者不可殫紀

太祖初年庶事草創犯罪者量輕重決之其後治諸弟逆黨權宜立法不一時康默記隸麾下有犯法者椎析律意論決重輕不差毫釐人人自以爲不冤十月詔群臣分決滯獄以韓知古領其事先是用法甚重滯亂不軌及逆父母者五車輶殺之訕詈犯上者以熱鉄椎舂其口殺之從坐者量罪杖決杖有二十大者重鐵五百小者三百又爲梟磔生盛射兎箭砲御支解之刑至是

下詔曰獄自北征以來四方獄訟積滯頗多今休戰恤民群臣其副朕意詳決之無或冤枉乃命北府宰相蕭敵魯等分道䟽決而以知古領焉 八年正月于越率賴之子化哥屢畜奸謀召父老群臣正罪并其子戮之有司所鞠餘黨三百餘人獄具上以人命至重死不復生賜宴一日隨其平生之好或歌或舞或戲射角觥各極其意酣飲明日乃以輕重論刑 神冊六年五月上謂侍臣曰凡國家庶務巨細各殊若憲度不明則何以爲治群下亦何由知禁乃詔大臣定治契丹及諸夷之法漢人則斷以律令仍置鍾院以達民寃

太宗天顯四年四月錄囚 七年時蕭海瑤被命案獄多

得其情人無冤者 十年四月錄囚 七年四月女巫
蕭古上延年藥方當用人膽和不數年殺人甚多至是
覺其妄射殺之 十二月詔群臣曰有罪者法當刑朕
或肆怒濫及無辜卿等切諫無或面從 十二年國舅
著帳郎君蕭延之奴海里疆陵拽刺禿里未及年之女
以法無文加之宮刑仍付禿里爲奴因著爲令 十三
年六月詔諸路錄囚 十五年除鷹坊刺面腰斬之禁
十六年諭有司先朝行次必高標禁行比故低置利
人誤入因之取財自今有復然者以死論

按遼史穆宗嗜酒及獵不恤政事五坊掌獸近侍奉膳
掌酒人等以獐鹿野豕鶻雉之屬亡失傷斃及私歸逃

亡在告踰期召不時至或以秦對少不如意或以飲食
細故或因犯者遷怒無辜即加炮烙鉄梳之刑甚者至
于無筭或以手刃刺之斬擊射燎斷手足爛肩股折腰
脛劃口碎齒棄屍于野且命築封于其地死者至百有
餘人京師置百尺牢以處繫囚及海里之死爲長夜之
飲五坊堂獸人等及左右給事誅戮者相繼不絕雖嘗
悔其因怒濫刑論大臣切諫然諫又不聽當其將殺壽
哥念古殿前都點檢夷膺葛諫曰壽哥等斃所掌雉畏
罪而亡法不應死帝怒斬壽哥等支解之命有司盡取
鹿人之在繫者九六十五人斬所犯重者四十四人餘
悉痛杖之中有欲寘死者王子必攝箠諫得免已而怒

頗德飼鹿不時致傷而斃遂殺之季年暴虐益甚嘗謂太尉化葛曰朕醉中有處決不當者醒當覆奏徒能言之無悛于事故及于難雖云虐止暫御上不及大臣下不及百姓然刑法之制豈人主快情縱意之具耶

景宗保寧元年時趙王喜隱自囚所擅去械鎖求見自辯語之曰枉直未分焉有出獄自辯之理命復繫之既而躬錄囚徒盡釋其罪三年以穆宗廢鍾院窮民有冤者無所訴仍命鑄鍾紀詔其上道所以廢置之意吳王稍爲奴所告有司請鞠帝曰朕知其誣若案問恐餘人效之命斬以徇五年十一月近侍實魯里誤觸神臺法應死校而釋之

聖宗統和元年二月詔所在官吏軍民不得無故聚衆私語及冒禁夜行違者坐之 四月樞密請詔北府司徒頗德鐸南京所進律文從之 七月親錄囚 十二月勅諸刑辟已結証決遣而有冤者聽請臺訴 詔叛逆之家兄弟不知情者無連坐著爲令從阿沒里諫也 二年四月皇太后臨決滯獄 四年正月皇太后決滯獄 八年正月詔決滯獄 九年閏二月遣翰林承旨邢抱朴三司使李嗣給事中劉子京政事舍人張幹南京副留守吳浩分決諸道滯獄 三月復遣課部員外郎馬守琪倉部員外郎和正虞部員外郎崔祐冀北縣令崔簡等分決諸道滯獄 十二年七月詔契丹人犯

十惡者依漢律初霽智皇后稱制留心聽斷嘗勸帝宜寬法律帝壯益習國事更定法令數端多合人心先是契丹及漢人相毆至死其法輕重不均至是亦一等科舊法死囚尸市三日至是一宿即聽收瘞 八月錄囚雜犯死罪以下釋之 十一月詔南京決滯獄 時即律隆運爲北府宰相奏諸鞠獄官吏多因請託曲加寬宥或妄行榜掠乞加禁止從之 十三年六月錄囚十四年五月詔叅知政事邢昺決南京滯獄所至人自以爲無冤 十一月決滯獄 十五年三月詔諸道歲其獄訟以聞 五月詔平州決滯獄 七月詔南京決獄訟 十月以上京訟獄繁冗詰其主者是年錄

四二 十六年七月錄囚 二十六年詔主非犯謀反
大逆及流死罪者其奴婢無得告首若奴婢犯罪至死
聽送有司其主無得擅殺 開泰二年正月錄囚 二
月遣北院樞密副使高正按察諸道獄 十一月錄囚
十三年正月錄囚 四月詔南京毋得淹滯刑獄以妨
農務 四年三月誥道獄空詔進階賜物 六月以政
事舍人吳克昌按察霸州刑獄 六年四月禁命婦再
醮 七月遣禮部尚書劉京翰林學士吳叔達知制誥
仇正已起居舍人程勣吏部員外郎南承顏禮部員外
郎王景運分路按察刑獄 七年四月禁匿名書 七
月錄囚 九月詔内外官因事受財事覺而稱子孫僕

從者禁之 八年九月二錄四 九年十二月禁僧燃
身煉指 太平元年二錄四 六年故事樞密使非國
家重務未嘗親決凡獄訟惟夷離婁主之及蕭合卓蕭
朴相繼爲樞密使專尚吏才始自聽訟時人轉相效習
以倣智相高乃下詔曰朕以國家有契丹漢人故以南
北二院分治之蓋欲去貪枉除煩擾也若貴賤異法則
怨必生夫小民犯罪必不能動有司以達于朝惟內族
外戚多恃恩行賄以圖苟免如是則法廢矣自今貴戚
以事被告不以事之大小並令所在官司案問具申北
南院覆問得實以聞其不案輒申及受請託爲奏言者
以本犯人罪罪之 七年七月詔更定法令詔曰制條

中有遺間及輕重失中者具條上之議增改焉 九年
十月耶律斜軫孫婦阿眡指斥乘與其孫骨欲爲之隱
事覺乃并坐之仍籍其家 十一年耶律僕里篤知興
中府以獄空聞 先是統和時五院部民有自壞鎧甲
者其長佛奴杖殺之上怒其用法大峻詔奪官吏以故
不敢酷又撻刺千乃方十醉言官掖事法當死特貰其
罪五院部民偶遺火延及木葉山兆域亦當死杖而釋
之因著爲法至于敵八哥始竊薊州王令謙家財及覺
以及刺令謙幸不死有司擬以盜論止加杖罪又那母
古犯竊盜者十有三次皆以情不可恕論棄市近侍劉
哥烏斯古嘗從齊王妻而逃以赦後會千秋節出首乃

詔諸近侍護衛集視而腰斬之于是國無倖免綱紀脩
舉吏多奉職民重犯法南京平易二州以獄空聞後至
諸道皆獄空有刑措之風焉 初帝徵服出獵識耶律
韓八有長才會南京疑獄久不決帝召韓八馳驛審錄
舉朝皆驚韓八決理無冤始服

興宗重熙元年先是南京三司銷錢作器皿三斤持錢出
南京十貫及盜遺火家物五貫者處死至是銅逾五斤
持錢及所盜物二十貫以上處死 五年四月新定條
制成詔有司定朝日執之仍頒行諸道蓋纂修太祖以
來法令叅以古制其法有死流杖笞及三等之徒凡五
百四十七條初上詔耶律庶成曰法令人命所繫不可

以不慎卿其審度輕重從宜修定至是始成行之 七
年五錄囚 十二月錄囚非故殺者減科 八年十一
月詔有言北院處事失平擊鍾及邀駕告者悉以奏聞
時有司獲盜八人既戮之乃獲正盜家人訴冤張儉三
乞申理上怒曰卿欲我償命耶儉曰少加存恤使得收
葬足矣從之 十年七月詔諸職官私取官物者以正
盜論諸敢以先朝已斷事相告言者罪之諸郎君將等
于禁地射鹿決三百不徵償小將軍決二百以下及百
姓犯者罪同郎君 十六年三月遣使審決雙州囚
十七年七月錄囚雜犯減死罪 十八年二錄囚去十
九年二錄囚 二十年九月詔更定條制時劉仲爲大

理正因奏獄上適與近臣語不顧伸進曰臣聞自古帝王必重民命願陛下省臣之奏上大驚擢樞密都承旨後提點大理寺明法而恕案冤獄全活者衆時又有群牧人竊易官印以馬與人者法當死帝曰一馬殺二人不亦甚乎減死論

道宗清寧元年十二月詔部署院事有機密即奏其投謗訕書輒受及讀者並棄市 二年正月詔州郡官及僚屬決囚如諸部例 閏三月南京獄空進留守以下官 六月詔強盜得實者聽諸路決之 四年六月制諸掌內藏庫官盜兩貫以上許奴婢告 六年六月遣使錄囚 十七年七月詔決諸路囚 咸雍二年七月錄

四時耶律玠佐西京嘗守一歲中獄空者三召爲孟父
房惕隱三年十一月詔給諸路囚糧六年帝以契
丹漢人風俗不同國法不可異施于是命惕隱蘇樞密
使乙辛等更定條制凡合于律令者具載之其不合者
別存之時校定官即重熙舊制更竊盜賊二十五貫處
死一條增至五十貫處死又刪其重複者二條爲五
四十五條取律一百七十三條又創增七十一條凡七
百八十九條增重編者至千餘條七年七月按問五
京囚十年五月錄囚太康元年六月遣使按問諸
路囚時北院樞密使耶律乙辛用事官婢單登等誣告
宣懿皇后乙辛以聞即詔乙辛劾狀因實其事上怒族

伶人趙惟一斬高長命皆籍其家仍賜皇后自盡 三年六月遣賜按五京諸道獄時乙辛又與其黨謀構昭懷太子陰令右護衛太保耶律查剌告知樞密院事蕭速撒等謀立皇太子詔案無狀出速徹等三人補外流護衛撒撥等八人詔告首謀逆者重加官賞否則悉行誅戮乙辛教牌印郎君蕭訛都幹自首臣嘗預速撒等謀因籍姓名以告帝信之以乙辛等鞠按至杖皇太子囚之宮中別室殺局不也撒刺等三十五人又殺速撒等諸子其幼稚及婦女奴婢家產皆籍沒之或分賜群臣燕哥等詐爲太子反書以聞廢太子徙上京乙辛陰遣人弑于囚所帝猶不寤朝廷上下無復紀律 四年

八月詔有司決滯獄 五年六月遣使錄囚時姚景行
鎮遼西以上京多滯獄命爲留守不數月以獄空聞
大安二年六月遣使按諸路獄 四年幹特刺爲契丹
行宮都部署以舊制北南府有訟各州府得就按之比
歲非奉樞密檄不得鞠問以故訟者稽留請如舊制從
之 五月詔諸部長親鞠獄訟 五年十月以新定法
令太煩典者不能徧習愚民莫知所避犯法者衆吏得
因緣爲奸乃詔曰法者所以示民信而致國治簡易如
天地不惑如四時使民可避而不可犯比命有司纂脩
刑法不能深明朕意多作條目以罔民于罪朕甚不取
自今復用舊法餘悉除之 時御史中丞耶律儼按上

京滯獄多所平反又武定軍節度使竇景庸審決冤滯
輕重得宜以獄空聞 壽隆六年六月遣使決五京滯
獄

天祚帝賞罰無章怨黜日起劇盜相繼叛亡接踵天祚大
恐益務繩以嚴酷由是投摧砲擲釘割鬻殺之刑復興
焉 天慶五年耶律章奴謀立魏王淳腰斬于市割其
心以獻祖廟分尸以徇五京

金

金初法制簡易無輕重貴賤之別刑贖並行天會以來漸
從吏議以杖折徒累及二百州縣立威甚者置刃于杖
屠于肉刑季年君臣好用笞笞故習由是以深文傳致

爲能吏以慘酷辦事爲長才有司奸賊真犯可決也而
微過亦然風紀之臣失糾皆決考滿校其受決多寡以
爲殿最原其立法初意欲以同踈戚一小大使成就繩
約于律令之中莫不齊手並足以聽公上所爲蓋秦人
強主威意也是以待宗室少恩待士大夫少禮終金之
代忍耻以就功名雖一時名士有所不免至于避辱遠
引罕聞其人若世宗臨馭法司奏讞或去律援經或揆
義制法言幾于道鮮有及之者章宗宣宗猶有祖風簡
牘所存可爲龜鑑

穆宗時若盜多欲皆殺之太祖曰以財殺人不可財者人
所致也遂立盜徵償法爲徵三倍

太祖天輔元年五月詔自收江寧州以後同姓爲婚者杖而離之

太宗天會二年五月詔曰新降之民訴訟者衆今方農時或失田業可俟農隙聽決 五年詔合蘇館諸部與新附人民同姓爲婚者離之 七年詔凡竊盜五十貫以上死徵償如舊制 金舊俗輕罪笞以柳莧殺人及盜劫者擊其腦殺之沒其家貲以十之四入官其六償主併以家人爲奴婢其獄則掘地深廣數丈爲之太宗時稍用遼宋法不循其舊矣 八年五月禁繼父繼母之男女無相嫁娶違者杖而離之

熙宗天眷三年復取河南地詔其民約所用刑法皆從律

文罷獄卒酷毒刑具以從寬恕 皇統間詔群臣以本
朝舊制兼採隋唐之制參遼宋之法類以成書名曰皇
統制頒行中外

海陵天德四年正月立捕盜賞格 貞元二年五月詔自
今上朔日不奏刑名尚食進饌不進肉 正隆四年正
月更定私相越境法並論死 五年二月遣引進使高
植刑部郎中海狗分道監視所獲盜賊並凌遲處死或
鋸灼支體截斷手足仍戒屯戍千戶誅克等後有犯者
並處死總管府官亦決罰 先是杖罪至百則臀背分
受及海陵時以脊近心腹禁之雖主決奴婢亦論違制
世宗大定元年立軍前權宜條理熙宗時有皇統制頒中

外至海陵正隆時又任情變易有續降制書與皇統制
並行及是以正隆之亂盜賊公行甲兵未息一時制旨
多從權宜乃集爲軍前權宜條理 四年九月上謂宰
臣曰權勢之家親識訴訟請囑官吏徃徃屈法伸情宜
一切禁止又尚書省奏大興男子李十婦人楊仙哥並
以亂言當斬上曰愚民不識典法有司亦未嘗叮寧告
戒豈可遽加極刑以減死論 是歲斷死罪十有七人
五年命有司復刪定條理與前制書兼用 六年十
二月詔有司每月朔望及上朔日毋奏刑名 七年五
月大興縣獄空詔賜錢三百貫爲宴樂之用 是歲斷
死囚二十人 八年二月制子爲改嫁毋服喪三年

九年御史臺奏獄事上曰近聞法官或各執所見或觀望宰執之意自今制無正條者皆以律文爲準復命杖至百者臂背分受如舊法已而又謂宰臣曰朕念罪人杖不分受恐至深重乃令復舊今聞民間不欲令罷之十年四月制命婦犯姦不用夫姦以子封者不拘此法十一月制盜太廟物者與盜宮中物同十一年詔諭有司曰司獄舍宇湏近獄安置囚禁之事常親提控其獄卒必選年深而信實者輪直十二年尚書省言內丘令蒲察臺補自科部內錢立德政碑復有餘錢二百餘貫罪當除名今遇赦當叙仍免徵贓上以其僞勿叙且曰乞取之錢若以赦原予者何辜自今可並追

還其主惟應入官者免徵咸平尹石抹阿汝刺以賊死
于獄蓋平其不尸于市也上曰貧窮爲盜出不得已三
品職官以賊致死不足憫矣其諸子可皆除名 十三
年詔立春後立秋前及大祭祀朔望上下弦二十四氣
雨未晴夜未明休暇并禁屠宰日皆不聽決死刑惟預
盜則不待秋後 四月定出繼子所繼財產不及本家
者以所繼財產與本家通計均分違者治罪又更定盜
宗廟器物法 是年五月尚書省奏鄆州民范三毆殺
人當死而親老無嗣上曰在醜不爭謂之孝孝然後能
養斯人以一朝之忿忘其身而有事親之心乎可論如
法其親官與養濟 十五年詔有司曰朕惟人命至重

重而在制竊盜賊至五十貫者處死自今可令至八十貫者處死 十七年陳言者乞設提刑司以糾諸路刑獄之失尚書省議謂久恐滋弊上乃令距京師數千里外懷冤上訴者集其事以待遷官就問又詔宰臣朝廷每歲再遣審錄官本以爲民伸冤滯也而所遺多不盡心但文具而已審錄之言非止理問審刑凡訴訟案牘皆當鞠其是非囚徒不應囚繫則當釋放官吏之罪即以上聞失覺察者嚴加懲斷不以贖論又以監察御史體察京北路官吏輒受訟牒爲不稱職笞之五十又謂宰臣曰比聞大理寺斷獄雖無疑者亦經旬日何耶叅知政事穆剌道對曰在法決死囚不過七日徒刑五日

杖罪三日上曰法有程限而輒違之地吏也罷朝御批
送尚書省曰凡法寺斷重輕罪各有期限法官的決豈
敢有違但以卿等所見不一至于再三始送其議定奏
者進奏牘亦不下旬日以致事多滯留自今當勿復爾
又曰故廣寧尹高禔爲政尚猛雖小過有杖而殺之者
即罪至于死而情或可憐猶當念之況小過也人之性
命安可輕哉又以正隆續降制書多任已

苛察

而與皇統制並用是非混亂莫知適從姦吏因得上下
其手遂置局命大理卿移刺愷總中外明法者共校正
乃以皇統正隆之制及大定軍前權宜條理後續行條
理論其輕重刪煩正失制有缺者以律文足之制律俱

缺反疑而不能決者則取旨書定軍前權宜條理內有
可以常行者亦爲定法餘未應者亦別爲一部存之參
以近所定徒杖減半之法凡校定千一百九十條分爲
十二卷以大定重修制條爲名詔頒行焉 十月更護
送罪人逃亡制 十二月以渤海舊俗男女婚娶多不
以禮必先攘竊以奔詔禁絕之犯者以姦論 十八年
正月定殺異姓周親奴婢同居卑幼輒殺奴婢及妻無
罪而輒毆殺者罪 十九年十月制知情服內成親者
雖自首仍依律坐之 二十年上見有蹂踐禾稼者謂
宰相曰今後有踐民田者杖六十盜人穀者杖八十並
償其直 二十二年三月詔頒重修條制 十二月立

續文獻通考

卷之百六十七

十六

四百六十五

強取諸部羊馬法 二十三年詔曰朕所行條制皆臣
下所奏行者天下事多人力有限豈能一一盡之必因
一事奏聞方知有所窒礙隨即更定今有聖旨條理後
有制條是使姦吏得以輕重也 武器署丞變直長骨
被坐受草貳卒財夾挾八十骨被笞二十監察御史梁
襄等坐失糾察罰俸一月上曰監察人君之耳目事由
朕發何以監察爲 上以法寺斷獄以漢字譯女直字
會法又復各出情見妄生穿鑿徒致稽緩遂詔罷情見
二十五年二月詔罪人在禁有朕聽親屬入侍 十
二月禁女直人不得改稱漢姓學南人衣裝違者抵罪
二月上以婦人在囚輸作不便而挾不分決與殺無

異遂命免死輸作者決杖二百而免輸作以臂背分決
二十六年尚書省奏定太子妃大功以上親及與皇
家無服者及賢而犯私罪者皆不入八議之例上謂宰
臣曰法有倫而不倫其改定之 監察御史陶鈞以
携妓遊北苑歌飲池島間道近殿廷提控官石玠聞而
發之鈞令其友閻恕囑玠得緩旣而事覺法司奏當徒
二年半詔以鈞耳目之官携妓入禁苑無上下之分杖
六十玠恕等皆坐之 二十八年十一月上以制條拘
于舊律間有難解之辭命刪修明白使人皆曉 二十
九年九月時章宗已即位制諸盜賊聚集至十人或騎五人以
上所屬移捕盜官捕之仍遞言省部三十人以上聞奏

違者杖百又制強族大姓不得與所屬官吏交往違者有罪舊制禁民不得收制書恐滋告誥之弊至是言事者乞許民藏之平章政事張汝霖曰昔子產鑄刑書叔向譏之者蓋不欲預使民測其輕重也今者不刊之典使民曉然知之猶江湖之易避而難犯足以輔治不禁爲便以衆議多不欲詔姑令仍舊禁之

章宗明昌元年上問宰臣曰今何不專用律文平章政事張汝霖曰前代律與令各有分其有犯令以律決之今國家制律混淆固當分也遂置詳定所命審定律令二年十一月禁俗人不得以歷代帝王爲戲及稱萬歲犯者以不應爲事重法科十二月定鎮邊守將致盜

賊罪 三年三月更定強盜徵贓品官及諸人親獲強盜官賞制 四月遣御史中丞吳昺樞等審決中都冤獄外路委提刑司處決 六月詔定內外所司公事故作疑申呈罪罰格 四年三月制定民習角觥搶棍罪 承安二年三月制軍前受財法一貫以下徒二年以上徒三年十貫處死 符寶典書北京奴盜符寶局金牌伏誅仍除屬籍按虎阿虎帶失覺察各杖七十 三年三月三月勅隨處盜賊毋以強爲竊以多爲寡以有爲無肅聚三十人以上奏聞違者杖一百 十一月定屬託罪法 時勅尚書省自今特旨事如律令程式者始可送部自餘躬行之事但召部官赴省議之 四年

五月以旱避正殿減膳審理冤獄 上以法不適平常行杖樣多不能用遂定分寸鑄銅爲杖式頒之天下且曰若以笞杖太輕恐情理有難恕者訊杖可再議之

五年四月尚書省進律義 五月刑部員外郎馬復言縣官尚苛刻者不遵銅杖式輒用大杖多致人命詔令按察司糾劾黜之 詔定進納官有犯決斷法 七月定居祖父母喪婚娶聽離法 十二月定管軍官受所部財物輒放離役及令人代役法 定造作不如法三年內有損壞者罪有差 十二月翰林修撰楊廷秀言州縣官往往以權勢自居喜怒自任聽從之際鮮克加審但使譯人往來傳詞罪之輕重傳于其口貨賂公行

冤枉有至二三十年不能正者上遂命定立條約違者
按察司糾之又命編先後條制書之于冊以備將來考
証 泰和元年正月尚書省奏銅杖式輕細民不知畏
請用大杖遂命所司量所記用大杖仍不得過五分
三月勅官司私文字避始祖以下諱小字犯者論如律
五月制尊長有罪卑幼追捕律 十二月司空襄進
新定律令勅條格式凡十二卷一曰名例二曰禁衛三
曰職制四曰九族五月廩庫六曰禮興七曰賊盜八曰
鬪訟九曰詐僞十曰雜律十一曰捕亡十二曰斷獄實
唐律也但加贖銅皆倍之增徒至四年五年爲七削不
宜于時者四十七條增時用之制百四十九條因而累

有所損益者二百八十有二條餘百二十六條皆從其
舊又加以分其一爲二分其一爲四者六條凡五百六
十三條爲三十卷附注以明其事疏義以釋其疑名曰
泰和律義自官品令職員令之下曰祠令四十八條戶
令六十八條學令十一條選舉令八十三條封爵令九
條封贈令十條官衛令十條軍防令二十五條儀制令
二十三條衣服令十條公式令五十八條祿令十七條
倉庫令七條廐牧令十二條田令十七條賦役令二十
三條關市令十三條捕亡令二十條賞令二十五條醫
疾令五條假寧令十四條獄官令百有六條雜令四十
九條釋道令十條營繕令十三條河防令十一條服制

令十一條附以年月之制曰律令二十卷又定制勅九十五條權貨八十五條番部三十九條口新定勅條三卷六部格式三十卷詔以明年五月頒行之 二年御史臺奏監察御史史肅言大定條理自二十年十一月四日以前奴娶良人女爲妻者並準已娶爲定若夫亡拘放從其主離夫摘賣者令本主收贖依舊與夫同聚放良從良者即聽贖換好未贖換間與夫所生男女並聽爲良而泰和新格復以夫亡服除準良人例離夫摘賣及放夫爲良者並聽爲良若未出離再配與奴或雜姦所生男女並許爲良如此不同皆編格官妄爲增減以致隨處致訟紛擾是涉違枉勅付所司正之初詔凡

條格入制文內者分爲別卷後詔制與律文輕重不同及律所無者各校定以聞如禁屠宰之類當著于令也慎之勿忽 三年七月右司郎中孫鐸以詳定所校律文名例篇進既而諸篇皆成復命中都路轉運司王寂大理卿董師中等重校之 四年七月上以諸路枷杖多不如法平章政事守貞曰枷杖尺寸有制提刑兩月一巡察必不敢違法也 四年四月大旱遣使審繫囚理冤獄 五月定省令史闕缺公務詭稱已稟擅退大理寺六部法狀及妄有所更易者罪 七月定申報盜賊制 八月以安州軍事判官劉常言諸按察司體訪不實輒加糾劾者從故出入人罪論若事涉私曲各從

本法 五年正月復令鈎校制律即付詳定所時詳定
官言若依重修制文爲式則條目增減罪名輕重當異
于律新律旣定復與舊同頒則使人惑而易爲奸矣臣
等謂用今制條叅酌時宜準律文修定歷採前代刑書
宜于今者以補遺缺取刑統疏文以釋之著爲常法名
曰明昌律義宰臣謂先所定令文尚有未完俟皆通定
然後頒行若律科舉人則專習舊律遂以知大興府事
尼龐古鑑御史中丞董師中翰林侍制奧屯忠孝提點
司天臺張嗣翰林修撰完顏撒剌刑部員外郎李廷義
大理丞麻安上爲校定官大理卿闡公員戶部侍郎李
敬義工部郎中賈鉉爲覆定官重修新律焉時奏獄而

法官有獨出情見者上曰或言法官不當出情見故論者紛紛不已朕謂情見非出于法外但折衷以從法耳平章守貞曰是制自大定二十三年罷之然律有起請諸條是古亦有情見矣上曰科條有限而人情無窮情見豈可無也 二月定鞠勘官受飲宴者罪 制盜用及偽造都門契者罪視宮城門減一等 四月定宮中親戚非官事傳達語言轉遞諸物及書簡出入者罪 六年三月定妻亡服內婚娶聽離制 四月制諸州司府縣造作不得役諸色人匠違者準私役之律計備以受所監臨財物論 六月定軍前差發賊罪 除飛蝗入境雖不損禾稼亦坐罪法 七年三月定蝗蝻生發

地主及隣主不申之罪 七月以山東盜制同黨能自殺捕出首免罪加賞法 九月更定受制忘誤及誤寫制書事重加等罪 八年七月詔更蝗虫生發坐罪法 九月更定安泊強竊盜罪格

宣宗貞佑元年十一月定失亡告身文憑罪 三年三月禁州縣置刃于杖以決罪人 四月詔百官吏兵亡失告身者見任保識重給妄冒則從詐僞法論罪 是年上謂宰臣曰自今監察官犯罪其事關軍國利害者並答決之 四月詔凡監察失糾劾者從本法論外使入國私通本國事情宿衛近侍官承應人出入親王公主宰執家災傷乏食有司檢覆不實致傷人命轉運軍儲

而有私載考試舉人而防閑不嚴其罰並決在京犯至
兩次者臺官減監察一等治罪論贖餘止坐專差任滿
日議定若任內曾以漏察被決依格雖爲稱職止從平
常者從降罰 興定元年三月勅尚書省學開刑名當
面議之勿聽轉奏 六月制增定逃軍捕賞者及居停
人罪 十月制定州縣失覺奸細罪 二年三月更定
京城捕告強盜官賞制 四月遣重臣審聽京師冤獄
六月以久旱諭宰臣治京獄冤囚 七月以久旱遣
太子太保阿不罕德剛禮部尚書楊雲翼分道審冤獄
十一月定京師失火罪格 三年閏三月申明屠宰
牛罪律 十月定賊吏計罪以銀爲則 四年九月更

定安泊逃亡出征軍人罪及捕獲賞格 五年九月更
定監察御史避犯的決法 十月尚書省言司縣官貪
濫不法部民逃亡既有決罰他縣藏匿亦宜定罪從之
十二月定詐誘軍人逃亡罪法 元光元年 八月
增定藏匿逃亡親軍罪及告捕賞格

哀宗正大元年五月詔刑部登聞鼓院毋鎖閉防護聽
有冤者陳訴 十二月左丞張行信言先帝詔國初刑
不上大夫治以廉耻丞相高琪所定職官犯罪的決百
餘條乞改依舊制從之 二年四月以京畿旱遣使慰
囚鈎許州 三年四月遣使慰囚 七年四月親衛軍
王咬兒酗酒殺其孫大理寺當以徒刑特命斬之

徒流 配役

宋理宗淳祐三年六月大理寺鞫前嘉定知縣旨枹尉趙
與玠等贓狀獄成旨枹與玠除名勒停枹一千里羈管
與玠五百里居住 景定五年七月刑部大理寺言朝
奉大夫監行在權貨務都茶場分權真州周福孫於
鈔茶引正官錢外初增事例錢四十二萬七千有奇入
已係監主詐欺從自盜法贓罪抵死詔特貸命追毀勒
停免真決不刺面流二千里追贓

邊

遷制流刑量罪輕重置之邊城部族之地遠則投諸化外
又遠則罰使絕域徒刑一曰終身二曰五年三曰一年

半終身者決五百其次遞減百又有黥刺之法其籍沒家屬法亦奚官奴遺制也

太祖案于越釋魯遇害事以其首惡家屬沒入瓦里及淳欽皇后時析出以爲著帳郎君至世宗詔免之其後內外戚屬及世官之家犯及逆等罪復沒入焉餘則沒爲著帳戶其沒入宮分賜臣下者亦有

太宗會同四年皇族舍利郎君謀毒通事鮮里等已中者二人命重杖之及其妻流于厥拔離拜河族造藥者

世宗天祿二年天德蕭翰劉哥及其弟盆都等謀反天德伏誅杖翰流哥遣盆都使轄受斯國

景宗保寧元年九月得國舅蕭海只及海里盜殺蕭思溫

狀皆伏誅流其弟神觀于黃龍府

聖宗統和四年八月第山西諸將功罪楊隱瑤昇洩刺剌烈朔州節度使慎思應州節度使骨只雲州節度使化哥軍校李元迪蔚州節度使佛留都監崔琪劉繼琛皆以聞敵逃遁奪宮配烈仍配隸本貫 二十八年五月詔帳族有罪黥並依諸部人例 二十九年詔丞相節度使世選家子孫犯徒杖當黥准法同科 開泰八年以竊盜賊滿十貫爲首者處死其法太重增至二十五貫其首處死從者決流 又詔自今三犯竊盜者黥額使三年四則黥面徒五年至于五則處死 九年十月鄧若老使沙州還詔釋宿累國法遠使多用徒犯罪而

有才者使還釋其罪

興宗重熙二年有司奏元年詔曰犯重罪徒終身者加以
捶楚而又黥面是一罪而犯三刑宜免黥其職事官及
宰相節度使世選之家子孫犯奸罪至徒者未審黥否
上諭曰犯罪而悔過自新者亦有可用之人一點其面
終身爲辱朕甚憫焉後犯終身徒者止刺頸奴婢犯逃
若盜其主物主無得擅黥其面刺臂及頸者聽犯竊盜
者初刺右臂再刺左三刺頸之右四刺左至于五則處
死 六年十二月南面侍御杜骨里詐取女直貢物罪
死上以有吏能黥而流之 二十一年七月近侍小底
盧實僞學御畫免死配沒終身

道宗大康二年十一月流林牙蕭岩壽于烏隗部以不進起居注也 三年五月以護衛撒撥等六人誣告蕭速撒謀立太子各鞭百餘徙于邊 大安二年七月置蕭酬幹于邊郡以其母燕國夫人厭魅梁王也

天祚帝元年四月徙耶律乙辛于孫于邊

金

太宗天會七年詔凡竊盜但得物徙三年十貫以上徙五年刺字充下軍三十貫以上徙終身仍以賊滿盡刺字于面五十貫以上死徵償如舊法

世宗時果肅爲濟南尹進疏曰刑罰世輕世重自漢文除肉刑罪至徒者帶鐐居役歲滿釋之家無蕪丁者加杖

准徒今取遼季之法徒一年者杖一百是一罪二刑也
刑罰之重于斯爲甚今太平日久當用中典有司猶用
重法臣實痛之自今徒罪之人止宜居作更不杖決不
報 大定九年二月詔妄言遼關兵馬者徒三年

章宗明昌二年十一月制投匿名書者徒四年 五年尚
書省奏在制名例內徒年之律無決杖之文徒不用杖
緣先爲流刑非今所宜且代流役四年以上俱決杖而
徒三年以上難復不用婦人比之男子雖差輕亦當例
減遂以徒二年以上者杖六十三年以上杖七十婦人
犯者並決五十著于勅條 承安五年八月定鎮防軍
犯徒配役法 泰和元年十二月新律成比唐制仍增

徙至四年五年爲七 六年三月勅尚書省祖父母父
母無人侍養而子孫遠遊至經歲者甚傷風化雖舊有
徒二年之律似涉太輕其再議以聞

元

世祖至元十二月二月禁民間賭博犯者流之 十三年
大名路達魯花赤小鈐部坐姦贓伏誅沒其家 十五
年正月勅官吏隱匿及擅易馬匹私配婦人者沒其家
軍官不撫治軍士及役擾致逃亡者沒其家貲之半
是年七月監察御史韓昂劾同知大都路總管府事舍
里甫丁毆部民至死詔杖之免其官仍籍沒家貲十之
二 十六年二月饒州路達魯花赤王古倫擅用羨餘

糧四千四百石杖之仍沒其家 是年八月詔漢軍出征逃者罪死且沒其家 九月同知總管府事董仲威坐贓罪行臺方按其事仲威反誣行臺官以他事詔免仲威官仍沒其產十之二 十七年七月宣慰使帖木兒不花言江淮郡縣首亂者誅沒其家詔中書省奏密院翰林院集議以聞 十一月詔有罪配役者量其程遠近 十九年十一月以勢家爲商賈者阻遏官民船立沿河巡禁軍犯者沒其家 耶律鑄言前奉詔殺人者死仍徵燒埋銀五十兩後止徵鈔二錠其事太輕臣等議依蒙古例犯者沒一女人仇家無女者徵鈔四錠從之

文宗至順元年二月行樞密院言征戍雲南軍士二人逃歸捕獲法當死詔曰如臨戰陣而逃死宜逃非接戰而逃輒當以死何視人命之易耶其杖而流之